

INUIT ATAQATIGIIT

INATSISARTUNI



Sisimiut, 30. August 2016

Inatsisartut suleriaasianni § 37 naapertorlugu Naalakkersuisunut imaattunik apeqqute-qarpunga.

Apeqqutit:

- 1. Qaanaami mittarfimmut aqquserngup ikaartarfittaa ukiut tamaasa kuugussaasussaajunnaarlugu suliarineqarniarpa?**
- 2. Qaanaami aqquserngit ima ajortigaat, asfalteqaratik, sialerluarsimatillugu sioqqat aqqusiniuniaraluartut kuugussaaginnaavillutik. Naalakkersuisut pissusissamisut isigaat, biilnut akitsuutit (vægtafgift) aqqusinertut taaneqarsinnaanngingajattunut atuutitissallugit ?**
- 3. Naalakkersuisut pilersaaruteqarpat sumiiffimmi taamaattuni akitsuutit atorunnarsinnissaat?**

(Inatsisartuni ilaasortaq Agathe Fontain, Inuit Ataqatigiit)

Tunngavilersuut:

Qaanaami qaammat august siallerujussuarmat, mittarfiup tungaanut aqqusineq kipineqarpoq, ikaartarfik kuugussamat. Allaat ullut ilaani tikittut mittarfimmiit illoqarfiup arsaattarfianut helikopterimik assartorneqartariaqarsimapput, aqutissaqanngimmata. Innuttaasut oqaluttuarput ukiut tamaasa aqqusineq taanna assinganik misigisaqarfigisuartarlugu.

Aqqusineq kuuffissuit mikisut atorlugit kuuffeqarpoq, illoqarfiulli ilaani kuuffiit ammalortorsuit angisuut atorineqartut kuugusaaneq ajorput. Mittarfiup tungaanut taamaattunik kuuffilersorniarneqarnersut paaserusunnarpoq.

Aqqusinernut akitsuut (vægtafgift) biilinnut akiliutigineqartarpoq, naatsorsuutigineqarluni aqquserngit asfalteffigineqarnermikkut biilerluni ingerlaffiusinnaassasut. Qaanaami aqquserngit sioraapput, kuugussaaginnavissut. Ilumut pissusissamisoornersuq apeqqusernarpoq, akitsuummik akiliutit tuffissaminnut tuttarnersut. Erseqqissassavara Qaanaami mekaniikereqanngilaq, biilillit saffissaannik. Aqquserngillu biilinnut sequtserisuullutik. Inuit biilillit nunap sinneranut sanilliullutik atugaat ajornerujussuupput, taamaattoq akitsuutinut akiliisarlutik. Eqqarsarnarpoq ilumut akitsuummik akiliutaasartut tunngavigisaat eqquutinneqartarnersuq.

Apeqqutit ullut qulit suliffiusut iluanni akineqarnissaat kissaatigaara.